

## CONVENIO DE COLABORACIÓN ENTRE A AXENCIA DE TURISMO DE GALICIA E O CONCELLO DE PONTEAREAS PARA A MELLORA PAISAXÍSTICA E DAS CONDICIÓNS DE SEGURIDADE NA SENDA DO TEA E NA ÁREA RECREATIVA A FREIXA

O xerente de Turismo de Galicia

### DECLARA:

Que esta Axencia Turismo de Galicia formalizou co Concello de Ponteareas o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2023.

Que o instrumento convencional ten por obxecto establecer as bases de colaboración entre a Axencia Turismo de Galicia e o Concello de Ponteareas para a mellora paisaxística e das condicións de seguridade na senda do Tea e na área recreativa A Freixa.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

**Primeiro.-** A Axencia Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en relación coa promoción da calidade e a innovación, o desenvolvemento, mellora, información e difusión do sector turístico galego, potenciando a devandita



oferta, mediante a comercialización, información e difusión do produto turístico da Comunidade Autónoma de Galicia.

Para lograr esta finalidade a Axencia Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.

**Segundo.-** O río Tea, por cuxos marxes transcorre a senda, é un Lugar de Importancia Comunitaria, así como unha Zona de Especial Conservación, declarado como tal o 31 de marzo de 2014. Así mesmo, tamén é unha zona de especial protección dos valores naturais (ZEPVN), definida como aquel espazo que, polos seus valores ou interese natural, cultural, científico, educativo ou paisaxístico, sexa necesario asegurar a súa conservación.

O Concello de Ponteareas é un dos máis poboados da provincia, sendo o de maior poboación dos cinco concellos que integran a Comarca O Condado. O río Tea que cruza o territorio deste concello conta ó longo do seu leito con tres importantes praias fluviais: Maceira en Covelo, Val en Mondariz e A Freixa en Ponteareas. Dada a localización da praia fluvial da Freixa a escasos metros do centro do casco urbano de Ponteareas, é un punto de referencia para o goce nun entorno natural de gran valor paisaxístico e medioambiental, non só para os veciños de Ponteareas, senón tamén para os habitantes da súa contorna o para os turistas que visitan a zona, o que a converte nun espazo moi concorrido, sobre todo na época estival, aínda que a afluencia de usuarios é importante ó longo de todo o ano, por tratarse dunha senda ideal para a práctica do sendeirismo e do deporte.

O tramo da senda fluvial do Tea non só é un eixe de unión entre parroquias e concellos que atravesa, senón que permite ós seus usuarios gozar do gran valor natural, ambiental e cultural que ofrece un bosque de ribeira cunha gran biodiversidade e riqueza botánica.

As inundacións acaecidas nos últimos anos deterioraron algúns tramos da senda fluvial, polo que as actuacións que se pretenden levar a cabo teñen un claro



obxectivo de conservación, e realizaranse unicamente sobre aqueles tramos da senda existentes nos que son necesarias reparacións ou labores de mantemento.

Na primeira parte do seu percorrido a senda cruza a área recreativa da Freixa, que inclúe unha praia fluvial, zonas deportivas e construcións auxiliares. Ó igual que a senda, as actuacións propostas na área recreativa están orientadas á conservación, á mellora da paisaxe e á seguridade dos usuarios.

**Terceiro.-** As actuacións que se pretenden levar a cabo pódense dividir en tres grupos:

#### **Grupo 1. Actuacións de melloras paisaxísticas e de seguridade da senda do Tea**

Actuarase unicamente naqueles tramos da senda existente nos que sexan necesarias reparacións ou labores de mantemento. As tarefas a desenvolver perseguen un obxectivo principal de conservación e mellora paisaxística, por iso a intervención será a mínima necesaria que permita obter os obxectivos perseguidos, respectando o importante hábitat no que se levará a cabo.

#### **Grupo 2. Actuacións para garantir a conservación das construcións auxiliares da área recreativa da Freixa**

Estas actuacións tamén se levarán a cabo sobre as catro construcións auxiliares para garantir a conservación da súa estrutura e do seu interior, evitando humidades e entradas de auga, para o que se montará unha cuberta en cada unha delas formada por paneis illantes sobre estrutura de madeira, e recubrimento con tella cerámica ondulada tradicional. Así evítaranse as filtracións de auga que están causando un deterioro progresivo e continuo das construcións.

#### **Grupo 3. Actuacións dirixidas á integración paisaxística das construcións auxiliares da área recreativa da Freixa**



As actuacións incluídas neste grupo consisten no revestimento dos muros de peche da planta principal das construcións auxiliares existentes na área recreativa da Freixa con paneis de madeira termotratada. Esta actuación vai dirixida a unha maior integración paisaxística co entorno protexido nas que se integran.

Con esta actuación quérese potenciar un elemento patrimonial do concello, favorecendo o uso e goce do entorno por parte de veciños e visitantes, revalorizando o patrimonio e fomentando o turismo patrimonial como un instrumento de reequilibrio territorial, o que supón a posta en valor turístico da citada infraestrutura.

Con estas actuacións preténdese a posta en valor dos recursos turísticos do concello, o que tamén contribuirá á revalorización do turismo da Comunidade Autónoma.

Que a través deste convenio, outórgase ó Concello de Ponteareas unha subvención directa en virtude do disposto no artigo 19.4 c) da Lei 9/2007, do 13 de xuño, de subvencións de Galicia, polas razóns de interese público, social, económico e humanitario expostas nos puntos anteriores que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, do 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.



E para que conste, asíñase esta memoria, en Santiago de Compostela

O xerente de Turismo de Galicia

Antonio Casas Calviño

